



類宮禮樂疏卷二

書館藏

浙西後學李之藻著

門人莆田余士芳校

從祀沿革疏

古者功臣與祭大烝未聞弟子而從祀於師者其從祀何也聖人之徒親炙私淑不必同然躬任斯道羽翼紹明夫皆有功後學列諸祀典亦崇德報功之義也元和過魯兼祀羣賢正始臨雍配專顏子自唐以降率躋經師至於禮備義嚴則於

今爲盛焉與從祀者子思孟子暨及門七十四子而外春秋迄漢共十人隋唐各一人宋十八人元一人

皇明四人共一百九人而顏路曾哲伯魚別祀啓聖祠

漢章帝元和二年二月幸魯祀孔子及七十二弟子

按此及光和鴻都門畫像皆稱七十二弟子考王肅本家語所載弟子前日七十二後日七十五其中間所列姓名自顏回至顏祖計七十六彼此互異史記載孔子之言曰受業身通者七十有七人北齊顏之推稱仲尼門徒升堂入室者七十有二顏氏居入唐顏真卿自叙家譜亦稱孔門達者七十二人顏氏有八今肅本顏氏止七人而史記有顏何字冉索隱證之曰家語字稱然則家語原有顏何肅本漏耳所云七十七人者是也家語無公伯僚秦冉鄒單史記無琴牢陳亢懸亶或謂懸亶即鄒單蓋字畫之誤云文翁石室圖七十二人比家語少公西輿懸亶原桃公有公夏守勾并疆邽選顏何八人多遠瑗秦冉林放三人蘇子由古史兼收論語家語史記凡七十九人唐贈典禮樂志及會要所載俱七十七人姓名與史記同獨杜氏通典所載除十哲外自計七十三人係增入遠瑗林放陳亢申棖琴牢琴張六人也夫遠瑗林放公伯僚未必弟子而琴張即琴牢

魏主芳正始二年使太常釋奠孔子於辟雍以顏淵配

按此顏子配享之始歷晉宋齊梁陳隋無改

北魏主宏太和十九年如魯城祠孔子改封二十八葉靈

珍爲崇聖侯拜孔氏四人顏氏二人官

按此顏子錄後之始 國朝景泰三年錄顏孟嫡孫世五經博士六年錄朱熹裔孫樾七年錄周敦頤裔孫冕弘治六年錄衢州孔氏孫彥繩俱五經博士正德元年設子思書院博士以衍聖公嫡次子孫爲之嘉靖改元又錄婺源朱氏孫聖十八年錄曾氏孫質粹于是四配俱世博士而朱氏乃有兩博士云

北齊制每月朔祭酒率諸生拜孔揖顏郡學亦每月朝

唐太宗貞觀二十一年二月壬申以左丘明卜子夏公羊

高穀梁赤伏勝高堂生戴聖毛萇孔安國劉向鄭衆賈逵杜子春馬融盧植鄭康成玄服子慎度何休王肅王

輔嗣彌杜元凱預范甯二十二代人代用其書垂於國胄

自今有事於太學與顏子俱配並為先師

按此諸儒配享之始○丘濬曰諸儒從祀孔子皆其有功於聖人之經者也卜子夏毛萇有功於詩左丘明穀梁赤公羊高有功於春秋伏勝孔安國有功於尚書高堂生戴聖有功於禮王輔嗣有功於易劉向鄭衆杜子春馬融盧植鄭康成服子慎王肅賈逵則通有功於諸經者何休杜元凱范甯則又有功於三傳者然子夏在十哲之列而此又列之者是時七十二子雖列像廟堂未得享祀惟子夏以有功於詩得在從祀之列

高宗永徽中制改先聖孔子為先師降顏回左丘明從祀顯慶二年詔仍以孔子為先聖左丘明等二十一人與顏

回俱配享于太學

總章元年贈顏回太子少師曾參太子少保並配享孔廟

此弟子追贈及曾子配享之始至開元八年李元瓘復請從享僅得坐次十哲當時舉廢之故載籍無徵二十七年孔子正南向位獨配顏子一人十哲贈侯而曾子弟贈以伯禮從貶殺然則顏曾並配在唐無定典也至宋咸淳復與思孟同為四配而迄今遂為永制矣

睿宗太極元年二月加贈顏回太子太師曾參太子太保

玄宗開元八年詔十哲為坐像悉從祀曾參坐十哲之次

圖七十弟子及二十二賢於廟壁

司業李元瓘言孔子廟顏子配其像立侍準禮投坐不立授立不跪請據禮文合從坐侍又四科弟子閔子騫等雖列像廟堂不參享祀謹按祠令何休等二十二賢猶霑從祀豈有升堂入室弟子獨不霑配享之餘望請

春秋釋奠列享於二十二賢之上又七十子之像文翁之壁尚不闕如豈有國庠遂無圖繪請命有司圖形於壁兼爲之贊又曾參考道可崇獨受經於夫子金聖從享乃詔顏子等十哲爲坐像悉從祀曾參坐次之圖繪七十子及二十二賢上以顏子亞聖親爲贊書刻於石仍令當朝文士分爲諸贊題其壁焉○按此十哲曾子坐像及親製御贊之始○馬端臨曰聖作之者也師述之者也述夫子之道以親炙言之則莫如十哲七十二賢以傳授言之則莫如子思孟子必是而後可以言先師可以繼先聖今舍是不錄而皆取於釋經之諸儒姑以二十二子言之左丘公穀猶曰受經於聖人至於高堂生以下則謂之經師可矣非人師也如毛鄭之釋經於名物固爲該洽而義理間有差舛至王輔嗣之宗旨老莊賈景伯之附會識緯則其所學已非聖人之學矣又况戴聖馬融之貪鄙固當見擯於洙泗今乃俱在侑食之列而高第弟子除顏淵之外反不得與李元瓘雖懇懇言之而僅能升十哲曾子儕於二十二子之列而七十二賢俱不霑享祀蓋拘於康成之註而以專門訓詁爲盡得聖人之傳也

二十七年八月贈顏回充國公配享文昭閣損費侯冉耕  
鄆侯冉雍薛侯冉求徐侯仲由衛侯宰予齊侯端木賜  
黎侯言偃吳侯卜商魏侯曾參邾侯顓孫師陳伯澹臺  
滅明江伯宓不齊單伯原憲原伯公冶長莒伯南宮适  
郊伯公皙哀郈伯曾點宿伯顏無繇杞伯商瞿蒙伯高  
柴共伯漆雕開滕伯公伯察任伯司馬耕向伯樊須樊  
伯有若卞伯公西赤邵伯巫馬施鄒伯梁鱣梁伯顏辛  
蕭伯冉孺郜伯曹卹豐伯伯虔鄒伯公孫龍黃伯冉季  
東平伯秦祖少梁伯漆雕哆武城伯顏高瑯琊伯漆雕  
徒父須句伯穰駟赤北微伯商澤睢陽伯石作蜀郈邑

伯任不齊任城伯公夏首亢父伯公良孺東牟伯后處  
營丘伯秦冉彭衙伯奚容蒧下邳伯公肩定新田伯顏  
祖臨沂伯鄒單銅鞮伯句井疆淇陽伯罕父黑乘丘伯  
秦商上洛伯申黨召陵伯公祖句茲期思伯榮旂零婁  
伯縣成鉅野伯左人郢臨淄伯燕伋漁陽伯鄭國滎陽  
伯秦非汧陽伯施常乘氏伯顏噲朱虛伯步叔乘淳于  
伯顏之僕東武伯原亢藉萊蕪伯樂欬昌平伯廉絜莒  
父伯顏何開陽伯叔仲會瑕丘伯狄黑臨濟伯邾巽平  
陸伯孔忠汶陽伯公西奧如重丘伯公西葢祝阿伯

按此從祀者封爵之始一公九侯六十七伯爵依唐書  
次序一本有蘧瑗衛伯於放清河伯陳亢顏伯申張魯

伯琴字南陵伯多五人

後唐明宗長興二年以顏子配坐閔損等十哲從祀堂上

又准太常禮院言勅四壁圖畫英賢各陳脯醢以祭

宋太祖建隆元年親製堯國公贊餘先賢先儒侍臣分贊

真宗大中祥符二年五月乙卯詔進封孔子弟子顏回以

下閔損瑯琊公冉耕東平公冉雍下邳公宰予臨淄公

端木賜黎陽公冉求彭城公仲由河內公言偃丹陽公

卜商河東公會參瑕丘侯顓孫師宛丘侯澹臺滅明金

鄉侯宓不齊單父侯原憲任城侯公冶長高密侯南宮

适龔丘侯公皙哀北海侯曾點萊蕪侯顏無繇曲阜侯

商瞿須昌侯高柴共城侯漆雕開平輿侯公伯寮壽張

侯司馬耕楚丘侯樊須益都侯公西赤鉅野侯有若平  
陰侯巫馬施東阿侯陳亢南頓侯梁鱸千乘侯顏辛陽  
穀侯冉孺臨沂侯冉季諸城侯伯虔沐陽侯公孫龍枝  
江侯秦冉新息侯秦祖鄆城侯漆雕哆濮陽侯顏高雷  
澤侯漆雕徒父高苑侯穰駟赤上邽侯林放長山侯商  
澤鄒平侯石作蜀成紀侯任不齊當陽侯申棖文登侯  
曹卹上蔡侯奚容蒧濟陽侯申黨淄川侯公祖句茲卽  
墨侯榮旂厭次侯縣成城武侯左人郢南華侯燕伋汧  
源侯鄭國胸山侯秦非華亭侯施之常臨濮侯顏噲濟  
陰侯步叔乘博昌侯句井疆滏陽侯公西輿臨胸侯顏

之僕寃句侯遽瑗內黃侯叔仲會博平侯顏何堂邑侯  
狄黑林慮侯公良孺牟平侯邾巽高唐侯孔忠鄆城侯  
申棖文登侯公西蒧徐城侯琴牢頓丘侯仍命宰執兩  
制館閣撰贊

初帝閣崇文院檢定七十二弟子案史記唐會要凡七  
十七人今曲阜廟惟七十二人帝曰何故不同王旦曰  
國學七十二弟子經太祖  
定議曲阜准國學畫像

七月戊寅封左丘明瑕丘伯公羊高臨淄伯穀梁赤龔丘  
伯伏勝乘氏伯高堂生萊蕪伯戴聖楚丘伯毛萇樂壽  
伯孔安國曲阜伯劉向彭城伯鄭衆中牟伯盧植良鄉  
伯杜子春緱氏伯馬融扶風伯鄭玄高密伯服虔滎陽

伯賈逵岐陽伯王弼偃師伯何休任城伯范甯新野伯  
贈蘭陵亭侯王肅司空當陽侯杜預司徒命羣臣爲贊  
仁宗明道元年八月詔國子監修七十二賢堂左丘明以  
下二十一人並以本品表冠圖之

神宗熙寧七年令諸州釋奠通祀十哲

京兆府教授蔣夔請以顏回爲兗國公母稱先師而祭  
不讀祝儀物一切降殺而進閔子騫九人亦在祀典禮  
官以孔子顏子稱號歷代各有據依難輒更改儀物祝  
獻亦難降殺所請九人已在此祀典熙寧祀儀十哲皆爲  
從祀惟州縣釋奠未載請自今二京及諸州  
春秋釋奠並準熙寧祀儀詔封孟軻鄒國公

元豐元年五月壬戌封孟軻鄒國公塑像同顏回配享文

封荀况蘭陵伯揚雄成都伯韓愈昌黎伯並從祀

先是熙寧中判國子監常秩等請立孟軻揚雄像於廟  
廷仍賜爵號又請追尊孔子以帝號下兩制禮官詳定  
以爲非是而止至是晉州教授陸長愈請春秋釋奠孟  
子宜與顏子並配議者以謂凡配享從祀皆孔子同時  
之人今以孟軻並配非是禮官言唐貞觀以漢伏勝高  
堂生晉杜預范甯之徒與顏子俱配享至今從祀豈必  
同時孟子於孔門當在顏子之列至於荀况揚雄韓愈  
皆發明先聖之道有益學者久未配食誠闕典也請自  
今春秋釋奠以孟子配食荀况揚雄韓愈並加封爵以  
世次先後從祀於左丘明二十一賢之間自國子監及  
天下學廟皆塑鄒國公像冠服同兗國公仍繪荀况等  
像於從祀荀况左丘明下揚雄劉向下韓愈范甯下冠  
服各從封爵詔如禮部議○按此孟子配享之始當宋  
盛時講明聖道者甚盛孔道輔况聖裔也然而兗州五  
賢之繪孟軻之次即列荀况揚雄次以王通韓愈夫以  
道輔且爾而元豐諸臣抑又奚貴乎荀揚今黜顧法言  
之揚雄又非劇秦美新之揚雄也胡  
正甫辨證甚晰當黜者似獨荀耳

八年二月命學士院撰鄒國公及荀揚韓子贊

徽宗崇寧元年二月追封孔鯉泗水侯汲沂水侯

大觀二年詔繪子思像從祀

從通仕郎侯孟請繪像從祀於左丘明二十四賢之間

四年九月追封公夏首鉅平侯扁處膠東侯公肩定梁父侯顏祖富陽侯鄒單聊城侯罕父黑祈鄉侯秦商馮翊侯原抗樂平侯樂欬建成侯廉絜胙城侯

議禮局言史記弟子傳曰受業身通六藝者七十有七人自顏回至公孫龍三十五人顯有年名及受業見於書傳四十二人姓名僅存家語曰七十二弟子皆升堂入室者按唐會要七十七人而開元禮止七十二人又復去取不一本朝議臣斷以七十二子之說取琴張等五人而去公夏首等十人今以家語史記參定公夏首后處公肩定顏祖鄒單罕父黑秦商原抗樂欬廉絜唐會要開元禮亦互見之皆有伯爵載於祀典請追贈侯

爵使預祭享從之

政和元年詔改從祀封爵之犯先師諱者於是改封曾參

武城侯顓孫師潁川侯南宮縚汶陽侯司馬耕睢陽侯

琴張陽平侯左丘明中都伯穀梁赤唯陵伯戴勝考城

伯

三年以王安石配享封舒王子雱從祀封臨川伯

新儀成以孟春元日釋菜仲春仲秋上丁日釋奠以顏孟安石配享俱東坐西向殿上閔損冉耕冉雍宰予端木賜金西向冉求仲由言偃卜商魯參金東向東廡顓孫師以下至揚雄四十九人金西向西廡林放以下至王雱四十八人並東向

五年春詔樂正子克配享孟廟公孫丑至子叔十七人從

祀各加封爵

封樂正子克利國侯公孫丑壽光伯萬章博興伯告子不害東阿伯孟仲子新泰伯陳臻蓬萊伯充虞昌樂伯屋廬連奉符伯徐辟僊源伯陳代沂水伯彭更雷澤伯公都子平陰伯咸丘蒙須城伯高子泗水伯桃應膠水伯益成括萊陽伯季孫豐城伯子叔承陽伯

靖康元年罷王安石配享猶從祀

右諫議大夫楊時言安石學術之謬請追奪王爵明詔中外毀去配享之像使邪說誠行不為學者之感詔落配享猶從祀又以尚書傳墨卿言禮饌依元豐祀儀陳設其五禮新儀勿復遵用

孝宗淳熙四年去王雱畫像

從趙粹中言也

理宗淳祐元年正月幸大學詔贈周惇頥汝南伯張載邵

伯程顥河南伯頥伊陽伯與徽國公朱熹竝從祀孔子

廟庭黜王安石

按此周程張朱從祀之始先是紹興中胡安國請追爵二程張邵從祀不報慶元中李道傳請取朱熹論語孟子集註大學中庸章句或問頥之太學仍請以周惇頥及二程張邵從祀嘉定末李心傳亦乞以司馬光周惇頥邵雍張載程顥程頥朱熹七人從祀皆未施行至是詔曰孔子之道自孟子後不得其傳至我朝周敦頥張載程顥程頥真見力踐深探聖域千載絕學始有指歸中興以來又得朱熹精思明辯表裏渾融使大學中庸語孟之書本末洞徹孔子之道益以大明於世其令學官列諸從祀以示崇獎尋以王安石謂天命不足畏祖宗不足法人言不足惜為萬世罪人不宜從祀其黜之

景定二年贈張栻華陽伯呂祖謙開封伯俱從祀

皇太子既謁孔子廟還奏曰乾淳間文公朱熹與宣公張栻成公呂祖謙志同道合切思講磨如義利之辯如

近思錄之書擇精語詳開牖後學誠有功於聖門今熹已秩從祀而祚祖謙尚未奉明詔臣竊望焉故有是詔

度宗咸淳三年以顏回曾參孔伋孟軻並配享進封參邨

國公伋沂國公定十哲位改封閔損費公冉耕鄆公冉

雍薛公宰予齊公端木賜黎公冉求徐公仲由衛公言

偃吳公卜商魏公躋顓孫進陳公祀泗水侯鯉位於

鄆城侯忠之次贈邵雍新安伯與溫國公司馬光俱從

祀

御筆邵雍天挺人豪英雄蓋世司馬光有德有言有功有烈朱熹贊之與周程張俱雍述經世書發先天奧旨而內聖外王之學實關吾道光著通鑑貽後世治法而真履實踐為時儒宗茲豈前代諸儒或以章句文詞得利于學者比朕將臨辟雍因思朱熹所贊已祀其四而尚遺雍光非缺歟其令學宮列諸從祀以示崇獎又御

筆惟孔子獨稱顏回好學固非三千之徒所同也而其學不傳獨曾子傳子思子思傳孟子忠恕兩語深契一貫之旨中庸一篇丕闡前聖之蘊而孔子之道益著向非顏曾思孟相繼演繹著書垂訓中更管商揚墨佛老幾何其不遂泯哉今顏孟侑食曾思不預尚為闕典其令禮官學官議可升曾思侑食併議可升十哲者以聞又詔泗水侯以先聖為之父以子思為之子而聞詩禮周南召南之學其在魯論著明如此鄆城侯忠其昆也亦在祀列伯魚可列于鄆城侯之次○按此顏曾思孟配享之始先是端平中禮部尚書李稟請以子思升祀堂上列在十哲之間至是乃定為四配居正位之東面西向其十哲少次殿上東西對列俱北上丘濬曰古者祭祀凡筵在西神皆東向漢帝幸魯祠帝升廟西面再拜唐開元禮亦謂先聖東向先師南向三獻官皆西向猶有古意自尊孔子為王之後始改從南面而配位則西向獻官序立東廡前而行禮執事者升降必由東階以神道尚右西乃迎送神之所避右不敢當尊故也宋人以顏孟配享俱列在神像之東其後因王安石配享乃以坐對顏子西坐東向其後革去安石從祀增入曾子子思俱坐於東此姚燧所以有江左進曾子子思

竝顏孟之說然謂之竝南面則不知何據也熊禾謂顏曾思孟所在學校皆東坐西向十哲兩廡從祀皆左右列則是宋末元初其制已如此矣今則四子者配享皆左右列不知始於何時意者宋金分治宋人之制如熊禾所云金人之制則以顏孟與孔子並列其後乎宋又加以曾思因而不改歟燧之所見蓋北方廟像歟鄭曉曰近世多議從祀諸儒而不及十哲十哲直取陳蔡一時與難之賢非孔門定論自開元迄今無敢議者夫有若之言四見於論語大類聖人公西赤志於禮樂有為邦之才其為言語政事不優於宰冉乎我求言行不必徵諸史傳論語中多有之視二子優劣何如宜進祀二子於殿上改求我廡中潘府曰溫公宋之儒者孝友忠信恭儉正直其學無所不通一時師儒賴之領袖其居政府尤有旋乾轉坤之功惜乎所見畧偏不能無可議者如非孟子而好揚雄則扶持聖教之功有歉矣黜蜀漢而帝曹魏則羽翼聖經之功有愧矣俾之從祀孔廟予恐其進無顏以見孟子退則諸葛亮文天祥之徒皆以無功著述不得同享焉其心亦將有不安者矣張朝瑞曰按鄭玄稱周公孔子俱為先聖故唐初嘗竝祀之至顯慶中以周公作禮樂當同王者之祀乃以

周公配武王而孔子獨為先聖夫周公象周易制禮作樂非無學術迺祀在彼不在此蓋各有所重也光功在社稷無愧周公以之配享哲宗廟庭可也况學尚可議何必從祀于孔子之廟哉王新建似亦當援此例藻按司馬公學術事功尚在歐陽之上而於繼往開來固未敢以輕許故存潘張二氏之論陽明闡發良知一匡俗學雖流趨超悟弊或近禪然卓爾儒宗又在司馬之上比例未允况周公自是先聖既已尊崇孔子自當別祀與後儒侑享之義原自不同

### 元仁宗皇慶二年以許衡從祀

張朝瑞曰元之大儒稱許魯齋吳草廬劉靜修三人而魯齋為優蓋直接乎朱子之傳者也遭逢世祖言聽計從以農桑學校導其君以小學大學訓其俗當被髮左衽之時而儒者之道不廢皆其功也但其任元一節關乎綱常係乎否泰非小失比論者謂吳草廬任夷之罪浮於魯齋然不過百步五十步之間耳彼既罷祀則此亦無顏列于俎豆間矣嘗觀魯齋臨終時戒其子勿請謚勿立碑謚碑且不安矣况安于文廟乎蓋魯齋之仕

元也學本正而遇則窮心可原而事則悖夫孔孟何教  
文廟何地從祀何典而可以夷狄之臣廁于其間哉何  
也愛典禮固甚于愛魯齋也然則賢如魯齋可無祀乎  
曰考之史魯齋嘗立教于燕京矣而北方之學者皆化  
焉詔祀于此其誰曰不宜此非愚之臆說也周禮稱大  
司樂凡有道德者使教焉死則為樂祖祭于瞽宗賈公  
彥釋之曰教在瞽宗故祭在瞽宗由是觀之祀魯齋于  
燕頗合禮經 藻按魯齋從祀瓊山丘氏亦議其非但  
胡元綱淪法敦儒教一脉非賴魯齋孰延  
遺燼夫人有功于一代儒教而可無祀乎

文宗至順二年加封顏回為兗國復聖公會參邾國宗聖  
公孔伋沂國述聖公孟軻鄒國亞聖公

國朝

太祖高皇帝洪武三年黜孟子祀踰年又奉

聖旨我聽得孟子辯異端闢邪說發明先聖之道今後依

還祭祀

二十九年春三月罷揚雄從祀進董仲舒追封江都伯

從行人司副  
楊砥議也

公從祀

時慈利教諭蔣明建議  
楊士奇胡濙等覆從之

宣宗睿皇帝正統元年閏六月丁卯考正兩廡從祀名爵  
位次頒圖於天下學校

用忠州訓導  
宋廣言也

二年二月以宋儒胡安國蔡沈真德秀從祀

憲宗純皇帝成化二年春正月改封董仲舒為廣川伯又封從祀諸未有爵者胡安國為建寧伯蔡沈為崇安伯真德秀為浦城伯

孝宗敬皇帝弘治元年冬十月議釐正文廟從祀不果行

禮科右給事中張九功請罷荀况馬融揚雄進禮部侍郎兼學士薛瑄下禮官集議尚書周經等言揚雄已黜於洪武時而薛瑄嘗與元儒劉因並欲從祀楊士奇謂其無著述而止自餘皆有羽翼聖經之功宜仍舊從祀○少詹事兼侍讀學士程敏政奏曰臣考歷代正史馬融初應鄧騭之召為秘書歷官南郡太守以貪濁免官髡徙朔方又不拘儒者之節前授生徒後列女樂為梁冀草奏殺忠臣李固作西第頌以美冀為正直所羞衆醜備於一身五經為之掃地劉向初以獻賦進喜誦神僊方術嘗上言黃金可成鑄作不驗下吏當死所著洪範五行傳最為舛駁使箕子經世之微言流為陰陽術家之小技賈逵以獻頌為郎不修小節附會圖讖以致

資顯蓋左道亂政之人王弼倡為清談注易專祖老莊范甯以為罪深桀紂何休則止有春秋解詁一書黜周王魯又註風角等書班固之於孝經論語蓋異端邪說之流也戴聖為九江太守治行多不法羅何武劾之而自免後為博士毀武於朝及子賓客為盜繫獄而武平心決之得不死則又告謝不慚身為賊吏子為賊徒王肅在魏以女適司馬昭當是時昭篡勢已成肅為世臣封蘭陵侯官至中領軍乃坐觀成敗及毋丘儉文欽起兵討賊肅又為司馬師畫策以濟其惡若好人佞已乃其過之小者杜預所著亦止有左氏經傳集解其大節蓋無可稱如守襄陽則數饋遺洛中饗要伐吳之際因斫瘦之譏盡殺江陵之人以吏則不廉以將則不義凡此諸人其於名教得罪非小而議者謂能守其遺經轉相授受不為無功夫守其遺經若左丘明公羊高穀梁赤之於春秋伏勝孔安國之於書毛萇之於詩高堂生之於儀禮后蒼之於禮記杜子春之於周禮可以當之以之從祀可也若融等不過訓詁此九人所傳者耳况其書行於唐故唐姑以備經師之數今易用程朱詩用朱子書用蔡氏春秋用胡氏又何取於不正之人使安享天下之祀哉至於鄭衆盧植鄭玄服虔范甯五人雖若

無過然其所著亦未能以發聖學若五人從祀則漢唐以來當預者尚多臣愚乞將戴聖劉向賈逵馬融何休王肅王弼杜預八人褫爵罷祀鄭衆盧植鄭玄服虔范甯五人各祀於其鄉后蒼在漢初說禮數萬言號后氏曲臺記戴聖等皆受其業禮記非后氏不傳乞與左丘明等一體從祀又孔子弟子見於家語自顏回而下七十六人家語之書出於孔子當得其實而司馬遷史記所載多公伯寮秦冉顏何三人文翁成都廟壁所畫又多蘧瑗林放申張三人先儒謂後人以所見增益殆未可據臣考宋邢昺論語注疏申張孔子弟子在家語作申續史記作申黨其實一也今廟庭從祀申張封文登侯在東廡申黨封淄川侯在西廡重複無稽一至於此且公伯寮愬子路以沮孔子乃聖門之蝨騰而孔子稱瑗爲夫子決非及門之士林放雖嘗問禮然家語史記邢昺注疏朱子集註俱不載諸弟子之列秦冉顏何疑亦爲字畫相近之誤如申張申黨者但不可考耳臣愚以爲申張申黨位號宜存其一公伯寮秦冉顏何蘧瑗林放五人既不載於家語七子之數宜罷其祀若瑗放二人不可無祀則乞記瑗於衛祀放於魯或附祭於本處鄉賢祠仍其舊號以見優崇賢者之意○何孟春

曰七十弟子門人有公孫尼子者作樂記緇衣矣吐詞爲經宜列從祀敏政乃不之及何耶○敏政又曰洪武二十九年司副楊砥建議黜揚雄進董仲舒矣然荀况揚雄實相伯仲而况以性爲惡以禮爲僞以子思孟子爲亂天下以子張子夏子游爲賤儒故程子有荀卿過多揚雄過少之說今言者欲黜况之祀宜也漢儒莫如董仲舒唐儒莫如韓愈而尚有可議者一人文中子王通是也通之言行先儒之論已多大約以爲僭經臣請斷以程朱之說程子曰王通隱德君子也論其粹處始非苟揚所及朱子曰文中子論治體處高似仲舒而本領不及爽似仲舒而純不及又曰韓子原道諸篇不免文士之習利達之求若覽觀古今之變措諸事業恐未若通之精到懇惻而有條理也至於河汾師道之立出於魏晉佛老之餘迨今人以爲盛則通固豪傑之士也今董韓並列崇祀而通不預疑爲闕典臣又按宋儒自周子以下九人同列從祀而尚有可議者一人安定胡瑗是也瑗之言行先儒之論已詳大約以爲少著述臣亦請斷以程朱之說程子看詳學制曰宜建尊賢堂以延天下道德之士如胡瑗張載邵雍使學者得以矜式朱子小學書亦備載瑗事以爲百世之法臣以爲自

秦漢以來師道之立未有過瑗者况宋端平二年議增  
十賢從祀以瑗爲首若以爲瑗無著述則元之許衡亦  
無著述臣考之禮有道有德於教於學者死則爲樂祖  
祭於瞽宗通瑗兩人師道百世如新得加封爵使與衡  
同祀於學宮最得禮意部議皆不從○國初王禕從祀  
議曰孔子廟庭從祀者凡百有五人自澹臺滅明至孔  
鯉七十一人皆受業聖人之門而承聖人之教者也自  
左丘明至許衡三十四人皆傳註聖經尊崇聖學而有  
功於聖人之道者也蓋自唐貞觀二十一年始以左丘  
明至范甯等二十一人從祀及宋元豐七年復增荀况  
揚雄韓愈以世次先後從祀左丘明二十一人之間淳  
祐元年乃以周敦頤程顥程頤張載朱熹列於從祀景  
定二年又增張栻呂祖謙咸淳三年又增邵雍司馬光  
及元皇慶二年乃以許衡繼宋九儒居從祀之列所謂  
三十四人者也以今論之漢儒之從祀者一人而猶闕者一  
人孔穎達是也宋之從祀者九人而猶闕者四人范仲  
淹歐陽修真德秀魏了翁是也元之從祀者一人而猶  
闕者一人吳澄是也自夫孟軻既往聖學不明邪說盛行  
異端並起歷秦至漢諸儒完經翼傳局於顯門之學

而於聖人之道莫或有聞惟董仲舒號稱醇儒其學博  
通諸經於春秋之義尤精所以告其君者如天人性命  
仁義禮樂以及勉強遵行正誼明道之論皆他儒之所  
不能道至其罷黜百家表章六經以隆孔子之教使道  
術有統異端息滅民到於今賴之功始不在孟子下以  
荀况之言性惡揚雄之事新莽猶獲從祀而仲舒顧在  
所不取何也秦焚之後聖經闕逸漢儒收拾散亡各爲  
箋傳而偏學異說各自名家晉宋以來爲說滋蔓去聖  
既遠莫可考證唐初孔穎達受詔撰定諸經之疏號曰  
正義自是以來著爲定論凡不本於正義者謂之異端  
誠學者之宗師百世之取信也何休註公羊而黜周王  
魯王弼註易而專尚清虛害道已甚然在祀列胡獨至  
於穎達而遺之聖人之道或著事功或載文章用雖不  
同實則一致三代以下人才莫盛於宋東都其間慨然  
以聖人之道爲己任而著之行事者范仲淹而已其言  
先憂後樂雖伊尹之任無以尚之况當其時天下學術  
未知所宗尚而仲淹首以中庸授張載以爲道學之倡  
蓋其爲學本乎六經而其議論無不主於仁義雖勲業  
未究而事功所及光明正大實與司馬光相上下自聖  
道不行世儒徒知章句以爲事而孰知聖人經世之志

固不專在是也歐陽修與仲淹同時明聖賢之學而著  
之文章其易春秋諸說詩本義等書發揮經學為精至  
其欲刪諸經正義識緯之說一歸於正尤有功于聖道  
至於本論等篇比之原道何愧而世之淺者每目之為  
文人夫文以載道雖經天緯地者亦謂之文而顧可少  
之哉然則如范仲淹之立功歐陽修之立名皆可謂有  
功於聖道者韓愈司馬光既列從祀則此二人固决在  
所當取者也自周敦頤接聖賢千載不傳之緒而程頤  
兄弟承之朱熹有作五經四子皆有傳註論述統宗會  
元集聖賢大成中更學禁真德秀魏了翁力以尊崇朱  
學為已任而聖賢之學乃復明真氏所著有大學衍義  
讀書記魏氏所著有九經要義大抵皆黜異端崇正理  
質諸聖人而不謬足以繼朱氏所傳之緒此二人者當  
繼朱氏而列於從祀者也及元興許衡起於北方尊用  
朱氏之學以教人吳澄起於南方孝經大學中庸易詩  
書春秋禮皆傳註隱括折衷於禮經尤多刪正凡以  
補朱氏之未備而其真修實踐蓋無非聖賢正大之學  
則其人又可謂有功聖人之道宜與許衡同列從祀按  
祀法有功於聖道則祀之是七人者其有功於聖人之  
道如此而從祀闕焉此甚不可又按聖孫孔伋故列孔

鯉之下而曾參亦在曾哲後咸淳三年始升配為四侑  
東坐而西向父祀庶下子配堂上尊卑舛逆莫此為甚  
聖人之道在於明人倫而先自廢亂何以詔後世借曰  
曾子子思以傳道為重然子必當為父屈昔曾祀僖公  
躋之閔公之上傳者謂子雖齊聖不先父食以為逆祀  
今孔氏曾氏父子之失序非逆祀乎是故曾參孔伋今  
當降居於曾哲孔鯉之下又司馬光於程顥程頤為先  
進張載於二程為表叔而位次皆在下其先後次序亦  
不可不明咸淳從祀徒依朱子六贊以周二程邵張司  
馬為序而不知朱子之贊特以形容六君子道德之盛  
初未嘗定其先後之次胡可遂據以為準乎是故司馬  
光張載今當陞居於程顥程頤之上若夫荀况揚雄何  
休王弼之徒有不當與於從祀者茲又未敢以遽數也  
嗟乎天下之禮有似緩而急似輕而重者以有關於名  
教也况乎禮文之事自儒者出則於有功聖道之人禮  
宜與祀而未稱於禮者固不得置之而不議列之如右  
庶議禮君子有所採擇云 藻按子克此議欲正曾子  
子思祀位居其父下果爾則曾哲伯魚庶祀可安而啓  
聖配可已也嘉靖諸議禮者似未睹此抑子淵之配非  
自宋始不可降而又無以處顏路故為是委曲耶罷揚

雄進董仲舒事在洪武而子充死節在前惜未之見程敏政之議嘉靖中多采行之荀况何休等視今俱罷吳沈則增祀而復罷王通歐陽修胡瑗真德秀今已俱祀特公孫尼子孔穎達范仲淹魏了翁似有所待然而可祀者尚不止于此也

### 八年八月追封宋楊時為將樂伯從祀

先是祭酒謝鐸言楊時息邪放淫不媿南軒所稱繼往開來吾道南矣實衍晦翁之派雖其晚節一出不克盡從其言而新經之闢誠足以衛吾道吳澄生長於淳祐貢舉於咸淳受宋之恩已如此其久為國子司業為翰林學士歷元之官乃如彼其榮跡其所為曾不及洛邑之頑民何敢望首陽之高士乞升時以上附宋諸賢之位斥澄以下從莽大夫之列尚書傳翰詆之且力稱前人之請為有見不可遽易焦芳曰所謂前人蓋楊士奇也今天下方議其當用之際雖從祀大事猶得私庇同鄉可又襲其非耶

和議以張國勢竄權臣以正邦憲培主德以崇治本胡安國謂當時若能聽用决救得一半時值洛學黨禁之餘指示學者以大本所在體驗之功轉相授受朱子得聞其指訣則見於何鏞之書朱子於理一分殊之說稱其所見益精則見於西銘之跋則以著述見少者亦未考之過也又按元史至正間因杭州路照磨何瑜建言已將時與李侗胡安國蔡沈真德秀並加封爵列從祀以世變不及徧行天下今躋於從祀實合公論遂躋時世宗肅皇帝嘉靖十三年釐正祀典以申黨即申棖存棖

去黨罷公伯寮秦冉顏何荀况戴聖劉向賈逵馬融何休王肅王弼杜預吳澄十三人祀其林放蘧瑗鄭象盧植鄭玄服虔范甯七人各祀於其鄉增后蒼王通歐陽

### 修胡瑗陸九淵從祀

張璪議曰歐陽修乃有宋一代人物所著本論實有翊衛聖道之功蘇軾曰自漢以來道術不出於孔氏而亂

天下者多矣五百餘年而後得韓愈學者以配孟氏蓋庶幾焉愈之後三百有餘年而後得歐陽子其學推韓愈孟子以達於孔氏故天下翕然師尊之曰歐陽子今之韓愈也夫韓愈既已從祀歐陽修豈可闕哉於是進修其餘稍采張九功程敏政之議○王世貞議曰四科十哲孔子偶追陳蔡之厄思不及門之士而記者追列其名耳不然何傳道若曾子者而不與也宰我冉求濫竽其間朽木糞土之謂見鄙聖門短喪自便之私得罪名教鳴鼓之攻非徒之責凜乎霜鉞乃使偃然於大聖一堂之上與顏閔比肩宜降置兩廡必欲補十哲之缺則有有若南宮适二子其言行蓋為純嫩可從顯孫師之例進補臣又考得嘉靖所進歐陽修者文章士也其行誼政術亦在中上嘗議易繫非聖無法而驟賢之臣祇以其所著濮議微會新禮遽登從祀臣以為登歐陽修不如登范仲淹仲淹力振綱常首扶神氣又能於戎馬倥偬之際以中庸誨引張載弭成大儒視修何啻倍蓰○陸九淵從行人薛侃議入其疏曰宋儒陸九淵生而清明學術純正自孟子沒而心學晦至宋周敦頤程顥追尋其緒九淵繼之心學復明當時呂祖謙張栻輩莫不悅服今諸子皆祀而九淵獨未從祀蓋以蚤歲嘗

與朱熹論說不合故其徒濟之為禪臣考九淵赴荆門時朱熹延入白鹿洞講論義利之旨聽者流涕熹亦嘆服又為之跋以為不迷於入德之方則其非禪明矣夫禪空寂其心遣人倫棄物理九淵之學如曰惟天下之至一為能處天下之至變曰先立乎其大者曰學莫先於義利之辯則皆孔孟之旨豈空寂其心者哉曰其何嘗不理會文字但理會與人別耳曰人情事勢物理上用功曰已德明然後推其明以及天下此豈遺棄倫理者哉况荆門之政可驗躬行之效則見於賢相之稱超然獨契乎本心以俟聖人百世則見於名儒之贊而宋朝議謚文安亦極尊美之辭及先儒吳澄許衡國朝名臣程敏政席書皆有撰述每稱其學之純獨陷於記誦詞章而莫自覺者乃以躬行實踐為近禪則世學之誤也請以九淵從祀

### 穆宗莊皇帝隆慶五年以本朝薛瑄從祀

成化初監臣李紳始請祀瑄嗣是屢有議及不果行至是給事中韓楫維遵御史馬三樂皆以為請乃躋瑄○霍韜議曰謹按歷代從祀孔庭之儒若孔門七十二賢則親炙聖化者也漢儒則蒐輯聖經者也唐儒則疏註

聖經者也宋儒則闡明聖經者也薛瑄生當聖學大明之時實能誦法孔子雖不如七十二子親炙孔門原其精神心術無頃刻不師孔子之教雖不必如漢儒蒐輯遺經實自童卯至歿齒無頃刻忘聖經之言雖不如唐儒宋儒疏註闡明遺經觀其讀書錄平易親切非身心體驗不能及蓋其造詣不及董仲舒而篤實似之穎悟不及韓愈歐陽修而篤行過之粹精淵微不及程顥而渾厚似之出處不改其操禍患不易其節貧賤不移其介身為世師言為世訓動為世式晦而彌彰抑而彌光非真誠積累之素不能也

今上萬曆十二年以本朝王守仁陳獻章胡居仁從祀

嘉靖初行人薛侃始請獻章從祀隆慶初御史耿定向始請守仁從祀至是御史詹事講請並祀二人祭酒張位又請並祀居仁乃下廷議禮部尚書沈鯉請獨祀居仁大學士申時行等仍請並祀三人其疏曰仰惟皇上重道崇儒德音屢下今該部覆議乃請獨祀布衣胡居仁臣等切以為未盡也彼詆訾守仁獻章謂各立門戶者必離經叛聖如老佛莊列而後可守仁言致知出于大學言良知本于孟子獻章言主靜沿于宋儒周敦

頤程巖皆祖述經訓羽翼聖真豈其自創一門戶耶事理浩繁茫無下手必于其中提示切要以啓關鑰宋儒曰仁曰敬亦各有主獨守仁獻章為有門戶哉其謂禪家宗旨者必外倫理遺世務而後可今孝友如獻章出處如獻章而謂之禪氣節如守仁文章如守仁功業如守仁而謂之禪可乎其謂無功聖門者豈必著述而後為功孔子刪述六經然曰予欲無言曰吾無行而不與二三子顏淵最稱好學然曰於吾言無所不悅曰退而省其私亦足以發夫聖賢於道有以身發明者比於以言發明其功尤大也其謂崇王則廢朱者不知道固互相發明並行不悖朱與陸辯盛氣相攻兩家弟子有如簞隙今竝祀學宮朱學不以陸廢今獨以王廢乎大抵近世儒者褒衣博帶以為容而究其實用往往病於拘曲而無所建樹博物洽聞以為為學而究其實得往往狃於見聞而無所體驗習俗之沉錮久矣今誠祀守仁獻章一以明真儒之有用而不安於拘曲一以明實學之自得而不專於見聞斯於聖化豈不有裨若居仁之純心篤行衆議所歸亦宜併祀我國家二百餘年理學名臣先後輩出不減宋朝至于從祀乃止薛瑄一人殊為闕典請益三賢以昭熙代文運

之隆是時議祀儒臣尚有陳真晟羅倫章懋黃仲昭吳與弼鄒守益王艮七人廷議以祀典隆重如宋儒游酢呂大臨謝良佐羅從彥李侗胡宏之倫殆勝今儒而未能盡祀姑以俟諸他日

### 四十一年以宋儒羅從彥李侗從祀

福建提學僉事熊尚文疏請崇祀羅李侍讀學士何宗彥等博議禮部覆疏曰謹按宋儒羅從彥者少鄙言語文字之學長絕利祿仕進之心從游龜山之門有幾虛一生之嘆信道敦篤築室羅浮山中端坐行吟克然自得學者仰之如泰山北斗又按李侗語治道先崇廉耻節義明學術嚴辯儒釋正邪受業豫章之門潛心顏子之學默坐澄心看喜怒哀樂未發氣象體認天理表章聖經先儒鄧迪稱其如冰壺秋月當時著述在羅則有春秋解及指歸毛詩解中庸語孟說又遵堯錄八卷行于世在李則有延平問荅要說錄此皆緒接真傳有功道統我朝稱道術必曰孔孟必曰程朱然孔子倡道于洙泗有曾子子思相繼發明而後孟子接其傳程氏倡道于伊洛得羅豫章李延平相承衣鉢而後朱子衍其緒羅李

之功與曾子子思等宜將二賢列宋儒揚時之下入朝崇祀從之藻按羅李二儒位列龜山之下似也但元晦受業於延平之門伯恭仲默亦皆後輩而位躡羅李併躡龜山分義尚乖必須更定其王陳胡三公亦似但以顯晦為序考其年次陳胡實在王前議禮者抑未深考歟

### 配享從祀位次

兩無位次重修會典及禮樂志諸書所列參差不一此遵嘉靖祀典

### 四配

### 復聖顏子

東一位

回字子淵魯人漢元和二年祀享孔廟唐總章元年贈太子少師開元二十七年加贈兗國公元至順二年加兗國復聖公嘉靖九年釐改今稱○宋太祖御製贊生值衰周爵不及曾一簞藜藿陋巷環堵德冠四科名垂千古沒表萬邦遂封東上高宗御製贊德行首科顯冠學徒不遷不貳樂道以居食埃甚忠在陋自如宜稱賢哉豈止不思理宗御製贊學冠孔門德行科首聞一知十若虛實有樂道簞瓢不易所守步趨聖人瞻若

其後王旦贊賢哉子淵惟仁是好如愚屢空鄰  
幾覩奧用行舍藏與聖同道封岱丁辰益茲榮號

宗聖曾子 西一位

參字子輿魯人唐總章元年追封太子少師太極元年  
進太子太保開元二十七年封郕伯宋祥符進取丘侯  
政和改武城侯咸淳三年進郕國公配享元至順二年  
加宗聖公嘉靖中改今稱○宋高宗御製贊夫孝要道  
用訓羣生以綱百聖以通神明因子侍師荅問成經事  
親之實代為儀刑 張齊賢贊孝乎惟孝曾子稱焉唐  
虞比德洙泗推賢服膺授旨終身拳拳封巒飾贈永耀  
青編 明陳鳳梧贊守約而博學恕以忠聖門之傳獨  
得其宗一貫之旨三省之  
功格物誠正萬世所宗

述聖子思子 東二位

伋字子思伯魚之子宋崇寧元年追封沂水侯咸寧三  
年進沂國公配享元至順二年加述聖公嘉靖中改今  
稱○宋理宗御製贊閑居請膺世業克昌可離非道  
孜孜立行發揮中庸體固有常人德樞要治道權衡

亞聖子孟子 西二位

軻正義作字子輿漢書作子車鄒人宋元豐六年追封  
鄒國公配享次顏子元至順二年加亞聖公嘉靖中改  
今稱○宋理宗御製贊道術分裂諸子為書既極而合  
篤生真儒詆訶揚墨皇極是扶較功論德三聖之徒  
十哲

先賢閔子 東一位

損字子騫魯人唐開元二十七年贈費侯宋大中祥符  
二年加封郕公咸淳三年改封費國公其稱先賢某  
子係嘉靖中釐改後同○宋高宗御製贊天經地義孝  
哉閔騫父母兄弟莫間其言汙君不仕志氣軒軒復我  
汶上出處休焉○王旦贊子騫達者閭閻成性德冠四  
科孝先百行人無間言道亦幾聖公袞增封均乃天慶

先賢冉子 西一位

耕字伯牛魯人唐開元贈郕侯宋大中祥符加封東平  
公咸淳改封郕國公○宋高宗御製贊德以充性行以

深身二事在躬日躋而新並驅賢科德顏與鄰不幸斯疾命也莫伸○王欽若贊聖門達者德行爲先洙泗來學顏閔差肩天封展禮公袞褒賢生則命寬歿而道宣

先賢冉子

東二位

雍字仲弓魯人唐開元贈薛侯宋大中祥符加封下邳公咸淳改薛國公○宋高宗御製贊懿德賢行有一則尊子也履之成性存存駢角有用犁牛莫論刑政之言惠施元元○王欽若贊不佞之仁具體之賢登彼堂與用之山川代逢偃華禮畢升裡錫之三壤賁茲九泉

先賢宰子

西二位

予字子我魯人唐開元贈齊侯宋大中祥符加封臨淄公咸淳改齊國公○宋高宗御製贊辯以飾詐言以致燁然有聞○馮拯贊綽彼宰予服膺宣父學洞堂無名揚鄒魯再期設問五常垂矩遇我慶成增封茅土

先賢端木子

東三位

賜字子貢衛人唐開元贈黎侯宋大中祥符加封黎陽公咸淳改黎國公○宋高宗御製贊謙德知二器實瑚璉動必幾先孰並其辯一使存魯五國有變終相其上譽處悠遠馮拯贊賜之望回獨云知二器稱瑚璉在禮斯賢服道稱師名垂萬世公爵尊崇時追肆類

先賢冉子

西三位

求字子有魯人唐開元贈徐侯宋大中祥符加封彭城公咸淳改封徐國公○宋高宗御製贊循良之要在於有政可使爲宰于室百乘師門育材治心扶性退則進之琢磨之柄陳堯叟贊謙謙令德少著嘉聞敏於從政洽於斯文垂鴻報本道遇明君永錫徽稱載揚清芬

先賢仲子

東四位

由字子路史記卞人家語一字季路唐開元贈衛侯宋大中祥符改河內侯咸淳加衛國公○宋高宗御製贊贊升堂維先于乘惟權陵暴知非委質可賢折獄言簡結纓禮全惡言不耳仲尼賴焉陳堯叟贊猗歟魯哲義

勇無儔獨立不懼從政惟優欽屬仁  
聖勒封介丘褒賢進號載顯英猷

先賢言子 西四位

偃字子游吳人唐開元贈吳侯宋大中祥符加封丹陽  
公咸淳改封吳國公○宋高宗御製贊道義正已文學  
擅科為宰武城聊以絃歌割雞之試牛刀謂何前言戲  
爾博約則多 趙安仁贊魯堂登科觀奧將聖武城之  
小可以觀政澹臺之舉行不  
由徑追建上公素風逾盛

先賢卜子 東五位

商字子夏衛人唐開元贈魏侯宋大中祥符加封河東  
公咸淳改封衛國公○宋高宗御製贊文學之日名重  
一時為君子儒作魏侯師不可後禮始可言詩假益小  
嫵聖亦不疵 趙安仁贊詩動天地起予者商濫柔立  
教文學升堂雅頌得所治亂  
攸彰慶成加增其道彌芳

先賢顓孫子 西五位

師字子張陽城人唐開元贈陳伯宋大中祥符加封宛  
丘侯咸淳改陳國公躋十哲○宋高宗御製贊念昔顓  
孫商德與鄰學以干祿問以書紳參前倚衡忠信是遵  
色取行違作戒後人 張齊賢贊堂堂張也商德與鄰  
尊賢容衆崇德依仁入趨函丈  
退而書紳升中優贈道與名新  
東廡 四十九位內先賢三  
十三位先儒十六位

先賢澹臺子 一位

臧明字子羽武城人唐開元贈江伯宋大中祥符加封  
金鄉侯○宋高宗御製贊惟子有道天與異容狀雖云  
惡德則其豐南止江沱學者雲從取士自茲貌或非公  
○溫仲舒贊不日徑行其真可賢不私見人其公可畏  
擊蛟既勇毀壁且義  
紀號益封旌厥賢士

先賢原子 二位

憲字子思宋人檀弓作仲憲唐追封原伯宋大中祥符  
加封任城侯○宋高宗御製贊軾彼窮閭達士所賓邦

無道穀進退孰倫敝衣非病無財乃貧賜雖不憚清節  
照人 向敏中贊賢哉子思介然清淨貧惟固學道乃  
非病衣冠志敝草澤遂  
性升中進秩垂芳尤盛

先賢南宮子 三位

迺字子容魯人史記作南宮括家語作南宮韜一作緇  
唐追封郊伯宋大中祥符加龔丘侯政和改封汶陽侯  
○宋高宗御製贊先覺既位簪履並馳尚德君子爾乃  
兼之羿皋可慚禹稷可師三復此道載觀白圭 寇準  
贊南容君子尚德聖門有道不廢危行遜言  
白圭三復執慎思存慶成旌善作壤佳藩

先賢商子 四位

瞿字子木魯人唐追封蒙伯宋大中祥符加封須昌侯  
○宋高宗御製贊易之為書彌綸天地五十乃學師則  
有是子能授受洗心傳世知幾其神宜被厥祀 晁迥  
贊易之為書窮理盡性瞿也親受抗心希聖韋編靡釋  
素風允兢展禮  
封侯千載輝映

先賢漆雕子 五位

開家語字子若蔡人史記漆彫開字子開魯人唐追封  
滕伯宋大中祥符加封平輿侯○宋高宗御製贊仕進  
之道要在究習具臣而居咎欲誰執斯未能信謙以有  
立闕里說之多士莫及 李宗諤贊闕里之堂邈矣難  
造猗歟子若實觀其奧學優當仕  
非乃攸好明祀益封式稽古道

先賢司馬子 六位

耕字伯牛宋人家語作司馬黎耕與史記俱字子牛唐  
贈向伯宋大中祥符加封楚丘侯政和改封睢陽侯○  
宋高宗御製贊手足甚親志異出處雖將為亂子乃脫  
去在汚能潔危而有慮內省若斯何憂何懼 楊億贊  
仁遠乎哉其言也詎虛往實歸馳思旁訊  
違難迷邦奚虞悔吝疏爵丁辰寵名以峻

先賢有子 七位

若史記字子若魯人家語作子有唐追封卞伯宋大中  
祥符加封平陰侯○宋高宗御製贊人稟秀德氣貌或

同而子儼然溫溫其容兩端發問  
未荅幾鋒以禮節和斯言可宗

先賢巫馬子 八位

家語期字子期陳人史記作巫馬施字子旗鄭玄云魯人唐封鄆伯宋大中祥符加封東阿侯○宋高宗御製贊天清日明密雲曷有師命持蓋子亦善叩惟夫子博三才允究學者之樂所得遂茂 趙昌言贊英英子施受天和氣名登魯堂位沈周季猶勤戴星庇民為治讓德進封垂芳永世

先賢顏子 九位

家語辛字子柳魯人史記作顏幸唐追封蕭伯宋大中祥符加封陽穀侯○宋高宗御製贊就封於蕭實惟子柳夙飭格言克遵善誘明德斯馨賢業所就以侑於儒傳芳逾茂 周起贊增封雲嶺詔驛魯堂顯允君子令儀有章英槩如挹德音不忘橫亘千古淳風載揚

先賢曹子 十位

卹字子循蔡人唐贈曹伯宋大中祥符加封上蔡侯○宋高宗御製贊肅肅曹伯王室之裔積習樂道切嗟明義惟善則主爾德是類史筆有煥令名永紀 楊紳贊三千孔徒七十賢者子循服道聖門之下笙簧經籍輔翼儒雅爵為蔡侯名器匪假

先賢公孫子 十一位

龍史記字子石鄭云楚人孟云趙人家語作公孫寵衛人唐贈黃伯宋大中祥符加封枝江侯○宋高宗御製贊黃伯著祀公孫是云彌縫中道協輔斯文藏修方異漸漬其勤史詞不忘播為清芬 王曾贊子石鉅賢探微博古稟粹荆衡從師鄒魯令聞不巳儀刑斯觀展義疏封遂侯故土

先賢秦子 十二位

商史記字子丕家語字丕茲魯人左作不慈鄭云楚人一云秦人唐贈上洛伯宋大中祥符加封馮翊侯○宋高宗御製贊孔父秦父相尚以力俱生賢嗣相與以德是父是子致詰疇克會弁儒林令名無極

先賢顏子 十三位

史記高字子驕家語作顏刻魯人唐追封瑯琊伯宋大中祥符加封雷澤侯○宋高宗御製贊瑯琊之伯其惟子驕微言既彰德音孔昭已觀雩舞同聽齊韶歷千百禩趾思高標 戚綸贊魯國諸生顏氏為盛達者升堂是以希聖龍章載加侯服輝映名著遺編人師往行

先賢穰駟子 十四位

赤家語字子從史記作壤駟赤字子徒鄭云秦人唐封北微伯宋大中祥符加封上邽侯○宋高宗御製贊式是壤伯昭乎聖徒執經請益載道若無詩書規矩問學楷模得時而駕領袖諸儒 陳彭年贊倚歟壤駟信而好古趨駕咸秦振衣鄒魯言必成文動不踰矩成禮介丘追榮社土

先賢石作子 十五位

史記蜀字子明家語作石子蜀秦人唐贈郿邑伯宋大中祥符加封成紀侯○宋高宗御製贊在昔石邑能知

所遵懋依有德克述無言鼓篋槐市揚名里門此道久視彼美長存 陳克贊宣尼日月無得而踰粵有哲士嘗為學徒登封偶聖至德崇儒以地進爵斯文迺殊

先賢公夏子 十六位

守字子乘史記作公夏首字乘鄭云魯人唐贈亢父伯宋大觀四年加封鉅平侯○聖門人物志贊洙水汪濊吸者滿腹子乘參之雅言攸服學以適道弗離其樸庶幾斯文令終有俶

先賢后子 十七位

史記后處字子里齊人家語作石處字里之唐贈營丘伯宋大觀加封膠東侯○宋高宗御製贊温温子里入聞至聖攬道之華秉德之柄深造闢域不乖言行全齊之封竹素榮盛

先賢奚容子 十八位

藏家語字子偕史記字子偕古史字偕文翁圖魯人正義衛人唐贈下邳伯宋大中祥符加封濟陽侯○宋高

宗御製贊雍容子哲已望堂室勿則有造成則祖述文  
采日化儒效力躬承觀厥成德音秩秩 楊紳贊雍容  
子哲服勤儒墨闕里橫經魯堂師德昔  
從游聘今逢檢勒皇賜信圭洙泗改色

先賢顏子 十九位

史記祖字襄家語作顏相又作祖字子襄魯人唐贈臨  
邑伯宋大觀加封富陽侯○聖門志贊武公崇基魯國  
益昌追跡好學熙有子襄探牘索  
隱識微知彰闕里茂才松檜蒼蒼

先賢句井子 二十位

家語句井疆字子疆闕里志字野山東志字子孟史記  
作句井正義作鈎井鄭云衛人唐贈淇陽伯宋大觀加  
封滏陽侯○宋查道贊衛之君子達者比肩服勤鼓篋  
學慕韋編升中覃慶儒術攸先徹侯疏爵闕里之賢

先賢秦子 二十一位

祖字子南魯人鄭云秦人唐贈少梁伯宋大中祥符加  
封鄆城侯○宋高宗御製贊秦有子南贊聖述作守道

之淵成德之博範若鑄金契  
猶發藥歷世明祀少梁寵爵

先賢公祖子 二十二位

史記句茲字子之家語作公祖茲魯人唐贈期思伯宋  
大中祥符加封卽墨侯○宋高宗御製贊惟彼子之錫  
伯期思與賢並進得聖而師彬彬雅道翼翼令儀一日  
至焉廟食不隳 梅詢贊子之生曾從師尼父恂恂闕  
里峩峩章甫非聖勿言惟道  
是與千古而下俾侯齊土

先賢縣子 二十三位

史記縣成字子祺家語作懸成字子橫魯人唐贈鉅野  
伯宋大中祥符加封武城侯○宋高宗御製贊至聖立  
教子祺安雅擅譽魯邦啓祚鉅野煒矣風猷時哉用捨  
出倫離類後學是假 石中立贊異能之士孔徒實繁  
悅服至德祖述微言富稟天爵  
游乎聖門追崇之典昨以侯藩

先賢燕子 二十四位

級字子思史記作伋字思秦人唐贈漁陽伯宋大中祥符加封沂源侯○宋高宗御製贊師席高振大成是集至道克傳賢達斯執善教云衰儒風可立漁陽之士得鼓而及陳知微贊八九之徒俱傳大義賢哉子思道本無媿鍾靈咸鎬浴德洙泗增封沂源皇澤斯被

### 先賢顏子 二十五位

之僕家語字子叔魯人史記字叔唐贈東武伯宋大中祥符加封宛句侯○宋高宗御製贊賢行顏叔親承尼父志銳所期道尊是輔泥在鈞陶木就規矩終縻好爵揚名東武崔遵度贊洙水悠悠子叔優優及肩等賜升堂並由元后時邁禮成介丘旌此達者爵為列侯

### 先賢樂子 二十六位

欽史記字子聲正義魯人家語作樂欣秦人唐贈昌平伯宋大中祥符加封建成侯○宋高宗御製贊樂氏子聲錫爵昌平信道之篤見善乃明引領高節載微思誠先賢聿集出為時英

### 先賢狄子 二十七位

黑家語字皙之一作子皙史記字皙衛人唐贈臨濟伯宋大中祥符加封林慮侯○宋高宗御製贊仰止狄皙抱負淵通游泳德化揚厲素風偉識既異持教乃隆厥志茂焉悲祀無窮姜嶼贊矯矯子皙來學有減依仁游藝攝齊升堂羽儀先聖物色上庠林慮錫壤百世之光

### 先賢子蔑子 二十八位

忠子蔑其字史記孔子兄孟皮之子家語作孔弗唐贈汶陽伯宋大中祥符加封鄆城侯○宋高宗御製贊惟子挺生道德之門佩服至論鯉則弟昆三得三亡所問殊温君子歸宓義不掩恩陳認贊賢哉先生聖口夫子道賢希聖口斯行已闕里服膺國庠從祀載享侯封式昭德美

### 先賢公西子 二十九位

歲字子尚史記作子上魯人唐贈祝阿伯宋大中祥符加封徐城侯○宋高宗御製贊猗爾子尚魯邦之望以

德則賢惟道是唱師聰師明友直友諒伯於祝阿儒風  
斯暢 劉筠贊魯多學者服勤遊聖祝羸惟肖哉也成  
性温有餘裕是亦為政  
追侯於徐用均天慶

### 先賢施子 三十位

之常字子常史記字子恒魯人唐贈乘氏伯宋大中祥  
符加封臨濮侯○宋高宗御製贊開國乘氏有德斯彰  
參稽百行贊理三綱自拔行間策名甚光在史藹藹歷  
久彌芳 王隨贊懿彼施常學深儒雅魯國上賢孔堂  
達者跡晦名彰德高言  
寡封侯是邦昭錫純嘏

### 先賢秦子 三十一位

非字子之魯人唐贈汧陽伯宋大中祥符加封華亭侯  
○宋高宗御製贊樂善哲士伯於汧陽傳道克正垂名  
允臧執德以弘用心必剛衰廣業履式贊素王 王隨  
贊七十之賢皆傳聖道彼美子之學臻堂奧珍席圭璋  
儒宮黼藻列爵  
華亭令名長保

### 先賢申子 三十二位

張見論語鄭云卽申續史記申黨字周家語申續字子  
周文翁圖作申堂後漢王政碑有羔羊之節無申黨之  
欲史記以黨為黨家語以續為績皆傳寫之誤固知申  
張申黨總是一人唐贈張為魯伯又贈黨邵陵伯宋大  
中祥符加封張文登侯黨又加淄川侯○宋高宗御製  
贊剛毅近仁志操莫渝性匪祝鮀面豈子都有一於此  
剛名可圖云慾則柔蓋生之徒 張智贊洙泗之秀橫  
經魯堂名亞十哲道尊五常時巡駐驂闕里增光封侯  
錫命□  
□□□□

### 先賢顏子 三十三位

曾字子聲魯人唐贈朱虛伯宋大中祥符加封濟陰侯  
○宋高宗御製贊褒錫朱虛在器輪輿儒室振領聖門  
曳裾賢業得蘊美才以攄百世不刊載觀成書 張象  
中贊回也庶幾諸賢近之洙泗受業汶上從師輔翊儒  
道經營德基俾侯  
於濟君子攸宜

先儒穀梁子 三十四位

赤字元始魯人尸子曰名俶顏師古曰名喜作春秋傳唐貞觀中從祀宋大中祥符追封襲丘伯政和改雒陽伯嘉靖中釐改稱先儒後同○宋理宗贊仲尼作經獲麟絕筆赤也發揮與義斯出立學名家道隆聖日列爵疏封式崇儒術

先儒高堂子 三十五位

生魯郡人索隱曰字伯傳儀禮十七篇后蒼戴慶等明其業唐貞觀從祀宋大中祥符追封萊蕪伯○宋周起贊秦曆告窮炎靈啓祚篤生令人允貞王度名教斯宗禮文有素勒封告成式昭餘裕

先儒毛子 三十六位

長趙人漢河間獻王博士大毛公享之子受詩號小毛公著毛詩故訓二十卷詩傳十卷馬融賈逵鄭康成皆宗之孔穎達為之傳唐貞觀從祀宋大中祥符追封樂壽伯○宋王曾贊孔徒受業商也言詩研精詰訓誰其

嗣之毛公與學永代師資疏封錫命禮治禎期

先儒后子 三十七位

蒼字近君東海剡人漢宣帝博士從孟卿受禮說禮數萬言號后氏曲臺記授聞人通漢慶普戴聖又事夏侯始昌通齊詩著齊詩故訓二十卷詩傳三十九卷授翼奉匡衡蕭望之傳師丹伏理嘉靖九年從祀○聖門志贊東海通儒孟氏高弟淹中古文獨詮其秘三家傳業曲臺揚厲禮教珍崇衰然博士

先儒杜子 三十八位

子春東漢河南人受周禮於劉歆傳鄭眾賈逵又明連山歸藏易唐貞觀從祀宋大中祥符加封緱氏伯○宋查道贊三川二室英靈所鍾學窮周制譽藹經宗杏壇闕里差可比蹤一命作伯慶我天封聖門志贊河間獻書周官殺青緱氏受之埒于六經學窮姬制譽藹漢廷九十尚存鴈行伏生

先儒韓子 三十九位

頁字豐卷 卷二 三十

愈字退之唐修武人諫憲宗迎佛骨所著有原道原性師說諸篇及文集四十卷終吏部侍郎贈禮部尚書謚文宋元豐七年從祀追封昌黎伯○聖門志贊倡始斯文不膠於物馳騫揚馬并包莊屈富澤孔周觚排老釋因文見道斗山蔚蔚

先儒程子

四十位

顥字伯淳河南洛陽人宋宗正丞其學得之周惇頤傳楊時諸子所著有定性書語錄學者稱明道先生嘉定謚純淳祐追封河南伯從祀元至順加封豫國公○宋朱熹贊揚休山立玉質金聲元氣之會渾然天成瑞日祥雲和風甘雨龍德正中厥施斯普

先儒邵子

四十一位

雍字堯夫其先范陽人徙河南受學李之才定易卦圖象著皇極經世觀物內外編漁樵問對擊壤集舉遺逸不出贈秘書省著作郎元祐中賜謚康節咸淳從祀追封新安伯○宋朱熹贊天挺人豪英邁蓋世駕風鞭霆

